

HSET II CORINHTO

Bàu hmàih ka oh daq

¹ Au kô Phaulô, tiaq manoh Boc Plình jah broq mangai tiaq cla da Chuaq Jesus Christ, xam Timôthê aih oh daq da bèn, achih am kaTagop Hadròeh oe ta Côrintô xam dìq ka mangai hadròeh oe jàp tagùng Achai:

² Waiq ka oh daq jah kan tabàih xam kan catèm enh Boc Plình, Baq bèn, hloe xam enh Chuaq Jesus Christ.

Kan alòng jò nansa

³ Manè apôi Boc Plình, aih Baq da Chuaq Jesus Christ bèn, aih Baq ma loq tamèt, aih Boc Plình am rìm kan alòng.

⁴ Haq alòng nhèn ta kan nanxa, dôq kan alòng haq ma khoe alòng nhèn, aih èh nhèn hadai jah alòng mangai qnoeq jò wì haq glàm kan nanxa!

⁵ Qmang ka nhèn khoe wiang pòq wê kan jìq da Chuaq Jesus Christ qmang leq, aih èh kan alòng da nhèn loh enh Chuaq Jesus Christ hadai bình qmang aih.

⁶ Tàng nhèn glàm kan mangò aih òdeq ka oh daq jah alòng jah dèch, yac ka nhèn jah kan alòng aih òdeq ka oh daq jah alòng, kan alòng aih jah hnoq jò oh daq ùh tagah lep ta kan nanxa qmang ka da nhèn.

⁷ Nhèn cajap manoh ngèh ta oh daq, majah qmang aih nhèn loq oh daq khoe jah wiang nanxa, aih èh oh daq hanoh wiang jah kan alòng.

⁸ Nhèn ùh enh òòeq ka oh ðaq ùh qnì ðeh cleq kan nanxa khoe trùh ka nhèn ta cròng Asi, wì khoe qmet hrìn nhèn, joq yeo loe ka padren nhèn, nhèn ma oe tangèh ka ðeh rìh.

⁹ Joq qmang aih, nhèn tiah ka mangai wì ma khoe taqmac ka nhèn kan cachit, òòq nhèn pi canòm ðeh cla, mahaq canòm ka Boc Plình aih Mangai broq ka mangai cachit rìh hlài.

¹⁰ Haq khoe ðèch nhèn claih ka kan cachit kàn qmang aih, èh oe raq ðèch hòh, joq, nhèn oe tangèh ka haq ðèch nhèn hòh.

¹¹ Qmang ka cla oh ðaq yòc ðeh bàu waiq khàn òòeq hu wiang ti nhèn, òòq bàc ngai wiang waiq khàn aih èh nhèn hu jah xôq ramot, òòeq nhèn wia nen am ka bàc ngai jah manè apôi Boc Plình am ka nhèn.

¹² Manòeq kô yiniq ma broq ka nhèn jah catèh raðeh aih manoh cliac nhèn wiang panhìn nhèn khoe yòc kan hadròeh xam manoh lem jang loh enh Boc Plình òòeq hu acaq oe ta cròng tanèh kô ti pì oh ðaq, kiang ma ùh hnau ka aih hòh nhèn ùh tiaq kan rabiaq da xech akia mahaq canòm kan tabàih enh Boc Plình.

¹³ Majah qmang aih nhèn ùh achìh ka oh ðaq bàì yiniq cleq broq ka oh ðaq ùh hlàt ðóc, ùh hlàt tàng. Au toq ngheq qmang aih,

¹⁴ tiah ka oh ðaq khoe jah loq ðeh ka nhèn toq biaq, èh oh ðaq jah loq qmòe ka lêh gèh rameh hòh aih nhèn broq ka oh ðaq jah ranhòm, qmang ka oh ðaq broq ka nhèn jah kan ranhòm oe ta hì ða Chuaq Jesus.

¹⁵ Au lùì ðeh joq qnàng trong aih, adroe kô nèh au khoe enh trùh hmàih ka oh ðaq, òòeq broq ka

oh daq jah lòeq yeo hnau tam ka aih.

¹⁶ Au ma enh jò au lam ta Maxêdoan, au thia ta oh daq adroe, èh enh Maxêdoan au wih hlài ta oh daq, enh aih oh daq qnong au lam ta gùng Jiudê;

¹⁷ jò au qnac dèh ta manoh qmang aih au kô ahiaq mangai taleq ùh lènh? Ùh meh ahiaq au tiaq deh xech akia òeq hu hatinh ka rađeh, dài au majah i jò: “Òq òq, i jò ùh ùh”?

¹⁸ Mahaq qmang ka Boc Plình ma ùh tablòq manoh, bàu da nhèn anoe ka oh daq hadai ùh xài i jò troq i jò ùh.

¹⁹ Kon da Boc Plình aih Chuaq Jesus Christ, dìq ka nhèn, ta aih i au xam Sinwan xam Timôthê ma khoe anoe hnài ka pì, aih ùh xài: “I joq i ùh”. Mahaq ta Haq aih toq joq raq.

²⁰ Majah qmang aih dìq ka bàu Boc Plình ma khoe tèu enh da lam ka haq aih joq dìq dǝng, èh enh dalam ka haq nhèn majah doe: “Amen” òeq broq qngah yiniq Boc Plình.

²¹ Manòeq kô Boc Plình aih Mangai ma khoe broq ka nhèn xam oh daq jah yòng cajap enh dalam ka Christ, khoe xùt dầu am ka nhèn;

²² Haq khoe yǝc dèh teo hadro òeq pateo ka nhèn rai am ka nhèn hang panhìn aih Yiang Hadròeh oe ta dalam nhèn.

²³ Au creo dang Boc Plình ngan hnoq ta manoh au, taiq au camaih ka pì dài au ma qnhòq wih hlài ta Còrintô,

²⁴ ùh xài nhèn enh broq gàu manoh lùì da oh daq, mahaq nhèn enh wiang dǝq kan lem bùì da oh daq jah rai èh rai bàc tam, majah qmang aih oh daq khoe cajap manoh lùì.

2

¹ Aih ìq dài au ma khoe qnac ta manoh ùh wìh hlài ta oh daq, aih blinh ùh xài òòeq hu broq ka oh daq mangò;

² majah qmang aih tàng au broq ka pì mangò aih èh broq qmang leq au ma oe tangèh jah kan lem bùi enh bài mangai au khoe broq ka wì haq mangò?

³ Au khoe achìh ka oh daq qmang aih òòeq jò au trùh, au ùh hìaq ep mangò ka pì oh daq aih bài mangai broq ka au jah lem bùi. Au lùì òòeq òòeq ka oh daq, mangai leq mangai meh òòeq yòc kan bùi au òòeq broq kan lem bùi ka rađeh.

⁴ Aih, wop ta jò nanxa hlàc hlai, catech cliac clèm, òòeq mat da òòeq, au achìh ka oh daq, ùh xài òòeq ka oh daq mangò, mahaq òòeq ka oh daq loq manoh da au ha-och ka oh daq òòeq leq.

Mangai i lui jah caqnaih

⁵ Tàng i mangai leq broq kan mangò aih ùh xài haq broq toq ka au mangò, mahaq broq òòeq ka oh daq mangò òòeq hra yac ka bàc bìa, au ùh i enh tapoch hrìn broq cleq,

⁶ taqne oh daq khoe i bàc ngai cwo lech ka haq, toq aih raq brì ka khoe lap.

⁷ Hêq manòeq kô oh daq cađac pi òòeq òòeq, rai padô òòeq òòeq haq ùh hìaq mangò hrìn loh hloe ka tacro.

⁸ Qmang aih, au cali calo ka oh daq paqnoh òòeq kan loq waq pì ka mangai aih.

⁹ Aih ìq raq au majah achìh ka oh daq, òòeq hu qnhro ngan rìm trong oh daq i iu loq ùh.

¹⁰ Oh daq khoe caqnaih da mangai leq yiniq lui, au hadai caqnaih. Tàng au caqnaih, aih enh ngèa ka Christ taiq oh daq au majah caqnaih;

¹¹ dôq Satan ùh hìaq jah blêq bèn, majah qmang aih ùh xài bèn ùh loq ka manoh da haq.

¹² Manòeq kô jò au khoe trùh ta Trô-ach òeq anoe Bàu lem da Christ, yac ka ta aih Chuaq khoe pèh ka au qmang,

¹³ mahaq dua au ùh catèm ta manoh, majah qmang aih, ta aih au qnhòq hnoq Tit aih oh daq au. Aih iq, dài au majah hangah ka oh daq gùng aih òeq hu lam ta Maxêđoan.

¹⁴ Mahaq manè apôi Boc Plình, haq broq ka nhèn jah blêq hloe hloe enh dalam ka Chirst, èh haq yôc nhèn òeq hu rai kan xua thùm trong canau loq ka haq rìm nòe.

¹⁵ Majah qmang aih enh ngèa Boc Plình, nhèn kô kan xua thùm da Chuaq Jesus Christ, oe ta adreo mangai jah dèch xam mangai hnhung lùch:

¹⁶ Am ka mangai kô xua kan cachìt broq ka cachìt, am ka mangai tau xua kan rìh broq ka rìh. Cabô ma taji òeq hu broq bài yiniq kô?

¹⁷ Nhèn ùh ti lam padro bàu Boc Plình hu chaq acaq tìah ka wì qnoeq. Mahaq nhèn yôc dèh manoh joq qnàng, bàu loh enh Boc Plình qmang leq, oe enh dalam ka Christ nhèn anoe hlài qmang aih enh ngèa Boc Plình.

3

¹ Ahìaq nhèn khoe wìa mangai loq pliang rađeh?
Hìaq khoe tìah ka wì qnoeq ep waq ka i mangai achìh jàiq tanap ka oh daq, ùh meh

canòm ka jàiq enh oh daq anoe trùh nhèn qmòh?

² Cla pì oh daq qmat raq thò tanap da nhèn, achìh ta cliac manoh nhèn, rìm ngai jah loq, jah đốc.

³ Joq qnàng oh daq qmat thò da Christ, nhèn kô ma achìh, ùh xài achìh xi mùc mahaq achìh xi Yiang da Boc Plình rìh halình, ùh xài achìh ta capiac hmo mahaq ta capiac xech akia, aih ta manoh da oh daq.

⁴ Canòm ka Christ nhèn cajap manoh lùì qmang aih enh ngèa ka Boc Plình.

⁵ Ùh xài cla nhèn hlàt hèm loh yiniq cleq đòeq hu broq, mahaq kan hlàt da nhèn dìq loh enh Boc Plình.

⁶ Haq khoe am ka nhèn kan hlàt đòeq nhèn hu patìh ka tajao maneo, ùh xài tajao da chù achìh, mahaq tajao da Yiang Hadròeh, majah qmang aih da chù achìh broq ka cachìt, yàng da Yiang Hadròeh broq ka rìh.

⁷ Tàng joq mangai patìh ka tajao da kan cachìt, achìh chù ta cachènh hmo, aih jì khoe jah ranhòm raya, jaq mangai Isorali loh qmòe ka pì jah chri hadrò Môise, majah qmang aih i kan canhia ta hadrò haq, yac ka doe kan canhia kô rênìh dìq.

⁸ Loq ka mangai patìh da Yiang Hadròeh ma ùh ranhòm yeo hnau ka aih!

⁹ Qmang aih, patìh ka trong ti taqmòq yiniq lui aih xôq khoe jah kan ranhòm, loq ka patìh trong aràng kan taq atoq aih èh jah kan ranhòm dàng leq hòh!

¹⁰ Majah qmang aih, kan ranhòm da tajao ma adroe khoe hnhung ta kan ranhòm yeo hnau da

tajao ma atiq,

¹¹ tàng yiniq ma ep hnhung lùch aih ji i jò jah kan ranhòm, loq ka yiniq ma cajap mòeq òe aih èh jah ranhòm dàng leq hòh!

¹² Nhèn i kan tangèh qmang aih, dài nhèn majah ùh hòq qmòe cleq.

¹³ Nhèn ùh broq qmang ka Môise, yóc bai prình dèh hadrò, dòq mangai Isorali ùh hìaq hnoq jò kan qngah dìq lùch.

¹⁴ Mahaq manoh wì haq khoe cadoq, dài trùh manòeq, jò wì òc tajao dùnh, bai prình aih oe raq qnhòq taclìh, majah qmang aih enh dalam ka Christ bai prình aih men hnhung.

¹⁵ Dài aih, trùh hì kô, jò wì òc ta hset Môise bai aih oe raq ta manoh wì haq.

¹⁶ Jò leq wì haq wìh hlài ta Chuaq, aih èh bai aih ma hì taclìh.

¹⁷ Manòeq kô Chuaq aih Yiang Hadròeh, Yiang Hadròeh da Chuaq oe taleq, kan paclaih oe ta aih.

¹⁸ Dìq dǒng bèn jah yóc dèh hadrò ralênh òeq hu ngan kan ranhòm da Chuaq qmang ka ta gùang, aih èh bèn jah wìh wìa mòeq dua tìah ka haq, enh kan ranhòm trùh ta kan ranhòm, qmang ka Chuaq aih Yiang Hadròeh.

4

Bàu lem gahnàp ka mangai kô, mahnò am ka mangai qnoeq

¹ Majah qmang aih, canòm kan loq waq khoe am, nhèn men jah broq mangai patìh qmang kô, dài aih nhèn majah ùh cro manoh,

² Ûh hnau ka aih hòmh, nhèn cađac đồng rìmh
biac jìang ka camaih cadoc hlep. Nhèn ùh tiaq
kan padô qnùt, hadai ùh ti gùt bàt bàu Boc Plình,
mahaq nhèn patô qnoh bàu joq qnàng, ðòeq jah
bàu manè apôi enh manoh cliac oh daq enh ngèa
ka Boc Plình.

³ Tàng Bàu lem da nhèn oe i kan gahnàp, aih
gahnàp toq ka bài mangai ma hu hnhung lùch;

⁴ craq kiac da qnhòng kô khoe bàng manoh cliac
bài mangai ma ùh lùì, dài wì haq majah pì hnoq
kan ranhòm qngah qngai ta Bàu lem da Christ aih
la qmù dua da Boc Plình.

⁵ Qmang aih, nhèn ùh ràu trùh cla rađeh, mahaq
nhèn anoe trùh Jesus Christ aih Chuaq da bèn,
taiq kan loq waq enh haq aih nhèn majah doe
rađeh kô hapōng oh daq.

⁶ Majah qmang aih, Boc Plình i doe: “Kan qngah
ep sreo loh enh qnòe clam!” Haq khoe broq kan
qngah haq jah qngah qngai ta manoh nhèn am
nhèn loq kan ranhòm haq sreo qngah ta hadrò
da Christ.

⁷ Mahaq nhèn khoe don ðòeq hang canaq kô ta
abôq taneh, ðòeq hu mahnu qnoh cwìang itai kàn
aih diq loh enh Boc Plình, ùh xài loh enh nhèn.

⁸ Wì khoe padit nhèn bàc trong, mahaq ùh hìaq
hech, glàm kan tagah lep mahaq nhèn ùh tacro
manoh.

⁹ Wì rùp canàt nhèn mahaq Boc Plình ùh cađac
nhèn lac lai, wì jêh nhèn khoe tacro mahaq ùh
hìaq cachit.

¹⁰ Nhèn xan pòq wê kan cachit da Chuaq Jesus
Christ ta chac nhèn, ðòeq kan rìh da haq hadai
jah hnoq ta chac nhèn.

¹¹ Qmang aih, nhèn kô mangai oe raq rìh mahaq khoe tah am ta kan cachit, òòeq hujah lòeq ka Chuaq Jesus, òòq kan rìh haq hadai jah paqnoh enh chac hamac ma loq cachit da nhèn.

¹² Qmang aih, kan cachit abroq enh dalam nhèn, kan rìh abroq ta oh daq.

¹³ Pàng nhèn ma khoe pajum mòeq manoh lùì, wop qmang ka bàu Hset Hadròeh doe: “Au khoe lùì dài au majah anoe”. Hanoh qmang aih diq, nhèn lùì dài nhèn majah anoe,

¹⁴ majah qmang aih, nhèn loq Mangai ma broq ka Christ rìh hlài aih èh hanoh broq ka nhèn rìh hlài ti Chuaq Jesus, broq ka nhèn xam oh daq jah yòng enh ngèa ka haq.

¹⁵ Rìm yiniq kô aih diq òòeq ka oh daq jah lòeq, òòq kan tabàih jah rai èh rai bàc, èh rai bàc ngai jah manè apôi, òòeq hutam ka Boc Plình kan ranhòm.

¹⁶ Aih iq dài nhèn majah ùh tagah lep manoh, yac ka hnoq mangai enh gùng rai èh rai pi nèn, mahaq kon mangai enh dalam rai èh rai wìh wìa maneo.

¹⁷ Majah qmang aih, kan xalep òò, bu hwòt hwat da bèn kô broq ka bèn jah kan ranhòm ranhình mòeq òòeq oe i jaq cleq,

¹⁸ qmang aih, bèn ùh ngan chaq yiniq ma hnoq xi mat, mahaq haqmiang chaq yiniq ma ùh xau hnoq, majah qmang aih yiniq ma hnoq xi mat kô mòeq rahyàc raq, yàng yiniq da mat ma ùh hnoq ma aih ma mòeq òòeq.

5

Hnim oe ta Plình

¹ Majah qmang aih bèn loq, tàng joq hnim bèn oe đồ ta crông taneh kô haq loh ka búc raliang, aih èh bèn i hnim mòeq đồe oe ta plình, Boc Plình ma broq, ùh xài broq loh enh tì kông kon mngai.

² Manòeq kô joq bèn qnang hràng ta hnim oe đồ kô, bèn òiq jaq ngèh ka jah caxùnh yốc hnim da bèn oe ta plình,

³ majah qmang aih jò bèn khoe jah caxùnh pi hĩaq oe hnoq bèn rahòng.

⁴ Jò bèn oe ta hnim oe đồ kô, bèn hràng enh qneq ka kan trap da haq, bèn ùh ngèh loh ka ralênh, mahaq bèn ngèh ka jah caxùnh yốc hlài hnim oe ta plình, đồeq bài yiniq maloq cachit ta chac bèn jah kan rih lonh đac.

⁵ Manòeq kô, Mangai ma padon palauq ka bèn jah bài yiniq kô aih la Boc Plình, khoe am ka bèn Yiang Hadròeh đồeq hu broq hang pacap ajang aih.

⁶ Aih òiq raq, yac ka jò leq dua bèn lùì rai canòm, majah qmang aih bèn loq jò bèn qnang oe ta chac kô aih bèn hangai ka Chuaq,

⁷ majah qmang aih bèn cadiang lam xi manoh lùì, ùh xài bèn cadiang lam xi mat hnoq.

⁸ Bèn bình manoh lùì qmang aih dài au majah doe: loh khoe ka chac kô đồeq hujah oe pajùm tì Chuaq, ma aih ma yeo enh.

⁹ Qmang aih, dài bèn yac ka oe, yac ka bèn loh enh chac kô, dua bèn àu òiq ka padren waq ka jah lem manoh Chuaq.

¹⁰ Majah qmang aih, kô èh bèn rìm ngai òiq ep yòng enh ngèa gèq hadrah da Chirst, đồeq rìm ngai jah waq deh hra tiaq trong lem trong qmèq bèn ma khoe broq jò bèn oe raq ta xech akia kô.

¹¹ Pang aih, nhèn i manoh loq iu yùq ka Chuaq, nhèn àu ti chaq trong òòeq hu broq ka mangai qnoeq òiq lùì, Boc Plình loq ka nhèn, nhèn hadai ngèh ta manoh cliac oh òaq loq ka nhèn.

¹² Nhèn ùh capoch manè rađeh enh ngèa oh òaq hòh, mahaq nhèn enh am ka pì oh òaq jah nen hu capoch manè nhèn, òòeq oh òaq jah hatèu ka bài mangai ma ti catèh bìac lem toq enh gùng, mahaq enh dalam aih dech ò.

¹³ Tàng joq nhèn loh ka ranhùà (qmang ka bàu qnah ngai ma òe), aih nhèn ranhùà ka Boc Plình, tàng nhèn clang, aih clang ka oh òaq.

¹⁴ Majah qmang aih kan loq waq da Christ tamèt ta manoh nhèn, nhèn hèm haiq tàng joq i mòeq ngai cachit am ka rìm ngai, aih èh rìm ngai hanoh cachit.

¹⁵ Chuaq khoe cachit am rìm ngai, òòq mangai ma oe rìh pì xài rìh toq ka rađeh hòh mahaq rìh am ka Mangai khoe cachit èh khoe rìh hlài ka rađeh.

¹⁶ Qmang aih, pang kô ta èh, nhèn pì top òua crống tanèh kô òòeq hu canau loq ka cabô hòh, yac ka adroe kô nèh nhèn hmaq tiaq òua crống tanèh òòeq hu canau ka Christ, manòeq kô nhèn pì ngan haq qmang aih hòh.

¹⁷ Qmang aih, tàng cabô oe enh dalam ka Christ, haq aih mangai khoe jah paneo hlài, bài yiniq ma òùnh khoe òiq, manòeq rìm yiniq òiq jah paneo.

¹⁸ Rìm yiniq aih òiq loh enh Boc Plình, haq khoe broq ka bèn jah canòm ka Christ òòeq hujah hatroq hlài ti haq, èh haq khoe am nhèn wìa mangai anoe hnài trong ta hatroq aih.

¹⁹ Majah qmang aih, enh dalam ka Chirst, Boc

Plình khoe broq ka kon mangai jah hatroq hlài ti cla haq, pì taqmòq yiniq lui ka wì hòm, haq khoe thê nhèn anoe hnài trong hatroq aih.

²⁰ Nhèn kô mangai da Christ thê, tìah ka Boc Plình hadai ajang nhèn hu bahmàng oh daq. Nhèn canòm yiniq da Christ òeq pariaq oh daq: Drah hatroq ka Boc Plình.

²¹ Taiq bèn, Boc Plình majah khoe broq ka Mangai ùh lòm i qmòe yiniq lui, loh ka pòq dǒng yiniq lui, dǒq bèn canòm ka haq aih, òeq hujah kan taq atoq da Boc Plình.

6

¹ Manòeq, nhèn kô mangai abroq pajùm ti Chuaq, dài nhèn àu anoe ka oh daq ma khoe jah kan tabàih enh Boc Plình apaq dǒq haq loh đac ka qngwan.

² Majah qmang aih haq doe:

“Au khoe tamàng bàu pì jò troq dèh jò,
Au khoe wiang ka pì oe ta hì dech paclaih.

Au doe ka pì manòeq kô raq jò troq dèh jò,
manòeq kô raq hì dèch paclaih!”

³ Nhèn ùh broq kan catoeh ka cabô, dǒq ùh hìaq i mǒeq nà bàu leq capoch qmèq trong nhèn ma patìh.

⁴ Mahaq rìm trong nhèn broq ka rađeh jah taji ka mangai hapǒng Boc Plình: Nhèn chiùq àt jaq cajoq: ta kan nan tǔng, kan pangot hrah, kan xalep;

⁵ jò wì jêh, jò wì clêh, jò loh ka manhài, jò tagah lep, qngah ka mang ùh jah kùi, cliac pangot;

⁶ ta kan hliang lem, kan qnì loq, ta kan loq àt, ta kan loq hanò, ta Yiang Hadròeh, ta kan loq waq joq qnàng.

⁷ Ta manoh hnhoh jang, ta cwìang itai da Boc Plình, oe ta tì kǝng pah qma pah qngeo, nhèn cadop wê ranac da kan taq atōq.

⁸ Yac ka jah nhòm, yac ka pòq bàu qmèq, yac ka jah bàu lem,

⁹ hnoq tìah gleq ùh cabô loq mahaq bàc ngai loq, hnoq tìah gleq ten cachit mahaq oe rìh trùh manòeq, hnoq tìah ka mangai wì baxa mahaq ùh hìah jêh đac;

¹⁰ hnoq tìah gleq mangò mahaq jah yôt kan lem bùi, hnoq tìah gleq pa mahaq broq ka bàc ngai jah padrông, tìah gleq ùh i qmòe cleq mahaq i rìm yiniq.

¹¹ Yôiq yôiq mangai Còrintô, hacùng bàu nhèn anoe jang, manoh nhèn pèch rùng ka oh daq.

¹² Ùh xài nhèn canit ka pì mahaq cliac manoh cla pì khoe broq ka rađeh loh ka canit.

¹³ Drah i chau manoh ka nhèn qmang aih diq, aih nhèn anoe ka pì tìah ka kon cla mhèn.

Christ xam Bêlian

¹⁴ Apa q pajùm long ech ti mangai ùh lùì. Majah qmang aih, kan taq atōq xam kan dù i jah pajùm ti dabau? Kan qngah xam kan clam wìa ka jah taqmùt ka dabau?

¹⁵ Christ xam Bêlian wa i pajùm cleq ka dabau, mangai lùì i wiang jah cleq ti mangai ùh lùì?

¹⁶ Hnim kùh waiq Boc Plình awìa ka pajùm ti radua qmù kan kiac? Majah qmang aih bèn kô

raq hnim kùh waiq da Boc Plình rìh halình, qmang ka Boc Plình doe:

“Au oe ti wì haq,
lam hlài tagne wì haq.
Au broq Boc Plình wì haq,
wì haq broq mangai da au”.

¹⁷ Dài aih, Boc Plình majah doe:

“Drah loh ma khoe enh wì haq beq, rai lah ðeh
crài ka wì haq,
Apaq poh ta dahwèq ùh sròeh,
Aih èh au hi ðìh yǒc pì”:

¹⁸ Khoe èh,
Au broq Baq pì,
Pì jah broq kon calô, kon cadrì da au,
Chuaq i cwàng itai rìm trong doe qmang aih”.

7

Phaulô jah alòng enh mangai Côrintô

¹ Manòeq kô, ðìq ðǒng ka oh ðaq da au, patep pang jò bèn khoe jah ðài bàu têu qmang aih, drah broq ka raðeh hreo ðìq ka kan amùa enh chac cla xam ta mahua yiang, yǒc manoh loq iu yùq ka Boc Plình ðòeq kan hadròeh bèn rai èh rai jah pageo.

Kan lem bùi da Phaulô

² Drah pèh manoh oh ðaq am ka nhèn: Nhèn ùh i broq haǒo ka cabô, nhèn ùh i qnùt cabô, ùh i blah acaq da cabô cleq.

³ Au anoe qmang aih, ùh xài ðòeq hu taqmòq yiniq lui ka oh ðaq, majah qmang aih adroe ka aih au khoe doe oh ðaq oe ta manoh cliac nhèn, yac ka cachit yac ka rìh ðìq hanoh qmang aih.

⁴ Au ùh i camaih cleq ka anoe ka oh daq, ta oh daq au i bàc yiniq òòeq jah catèh raðeh, qne kan nanxa au jah bàc kan alòng, jah kan lem bùi haraya.

⁵ Majah qmang aih, jò nhèn trùh tagùng Maxêdoan, chac hamac nhèn ùh dùh ka jah padài. Nhèn nanxa bàc trong: Enh gùng glàm toq kan tablah tablêq, enh dalam glàm toq kan yùq crè.

⁶ Mahaq Boc Plình aih Mangai alòng mangai tagah manoh, khoe alòng au majah qmang aih Tit khoe jah trùh ta aih;

⁷ ùh xài toq cla haq trùh, mahaq hloe xam kan alòng haq khoe jah enh oh daq. Haq anoe ka nhèn loq oh daq toq tangèh, crò hmoe, manoh oh daq joq loq nhet trùh au joq qnàng, aih iq dài au majah lem bùi yeo hnau hòm.

⁸ Hi loq tajàiq au ma achìh ka oh daq, khoe broq ka oh daq mangò, mahaq au ùh i rawòe cleq, (tàng adroe ka aih au i rawòe, majah qmang aih au hnoq ta jàiq aih au i broq ka oh daq mangò toq biaoq),

⁹ mahaq manòeq kô au lem bùi, ùh xài lem bùi ka oh daq khoe ep mangò, mahaq lem bùi majah qmang aih kan mangò da oh daq broq ka oh daq i manoh loq raxach. Joq qnàng, oh daq khoe mangò tiaq manoh Boc Plình enh, qmang aih nhèn ma i hăbo ka oh daq cleq.

¹⁰ LeLv 26:12; XuXh 29:45; Exe Ed 37:27; Gie Gr 31:1Majah qmang aih kan mangò tiaq manoh Boc Plình broq ka bèn loq raxach, kan raxach aràng bèn trùh kan dèch claih mahua yiang, trong aih ùh broq ka bèn ep rawòe, yàng kan mangò tiaq da crống taneh kô qnung bèn trùh ajang kan cachìt.

¹¹ Ngan beq, kan mangò tiaq manoh Boc Plình khoe broq ka oh daq jah kan alàng dàng leq, kan enh broq hreo ka rađeh, mangò noèh, loq yùq crè kan loq nhet, loq haqnàn. Oh daq khoe am mangai hnoq đeh hra dìq dõng ta bài yiniq aih oh daq joq hreo hliang.

¹² Qmang aih tàng joq au khoe achìh jàiq ka oh daq, aih ùh xài achìh ka mangai ma broq ùh troq, hadai ùh xài ka mangai khoe pòq đeh kan hašo, mahaq dõq ka manoh da oh daq ma loq waq ka nhèn jah bàc ngai hnoq enh ngèa Boc Plình,

¹³ bài yiniq aih khoe alòng dìq ka nhèn. Nhèn bùi yeo loe ka aih hòm jò nhèn jah hnoq kan lem bùi da Tit, majah qmang aih dìq ka pì khoe broq ka mahua yang haq jah blình hlài.

¹⁴ Au khoe catèh ka Tit loq trùh pì oh daq, ùh i cleq au ma ep xep, EsIs 52:11majah qmang aih bàu nhèn ma anoe aih dìq joq qnàng, dài haq bàu nhèn ma capoch manè oh daq ka Tit aih dìq bàu joq qnàng.

¹⁵ Jò haq hmàng trùh kan loq iu da oh daq, oh daq khoe đìh haq dìq ka manoh, rai loq iu loq yùq, aih èh manoh loq waq haq am ka oh daq kiang rai bàc tam.

¹⁶ Au dìq jaq lem bùi, majah qmang aih rìm trong au dìq khoe khòh lùì oh daq.

8

Manoh cliac da mangai Maxêđoan

¹ Manòeq kô, nhèn enh anoe ka oh daq loq xôq ramot Boc Plình khoe am ka bàc Tagop Hadròeh oe tagùng Maxêđoan:

² Wop jò bàc kan ranàc kàn trùh ðòeq hu qnhro wì haq, aih manoh cliac da wì haq dua lem bùi pì cajaq, yac ka wì haq pa hamoq mahaq manoh cliac da wì haq dua loq hamah.

³ Kô au anoe ka oh daq loq: Cla wì aih khoe creò adràc dabau wiang tagop bàc jèn tiaq deh padren hlàt pang leq, qnah ngai loe deh ka padren,

⁴ khoe aih cali calo àu bòch nhèn am wì haq jah wiang ðeh moeq qnah ðòeq tabàih ka mangai da Chuaq qnang nanxa.

⁵ Wì haq broq yeo loe ka manoh nhèn ma ngèh, adroe aih cla wì haq khoe dèch raðeh ka Chuaq, khoe aih ka nhèn, tiaq manoh Boc Plinh ma enh.

⁶ Aih iq dài nhèn majah hi thê Tit aràng ka wì oh daq, ðòeq hu pagêh trong lem kô, qmang ka haq khoe patep broq enh adroe.

⁷ Manòeq kô, bàc trong oh daq khoe jah yeo loe: aih trong manoh lùì, bàu tapoch, trong loq iu, trong loq nhet, kan loq waq ka nhèn, aih èh pì hadai khòh ngan khòh nhet ka broq ma yeo loe trong yiniq broq lem qmang kô.

⁸ Anoe aih ùh xài au toq ti thê pì, mahaq wì qnoeq khoe broq dua lem, aih au hadai enh qnhro ngan kan loq waq da oh daq haq joq pang leq.

⁹ Majah qmang aih, oh daq loq kan tabàih dech enh Chuaq Jesus Christ bèn, haq aih padrông, mahaq taiq oh daq haq majah broq ka raðeh loh ka pa, ðòeq canòm kan pa da haq, oh daq jah padrông.

¹⁰ Au achoh bàu ka oh daq qmang aih, trong aih jah ka pì raq, majah qmang aih bàc hanam adroe,

oh daq raq mangai ma qnong ngoe, ùh xài toq broq yiniq lem qmang kô mahaq pì broq qmòe rai lem bùi.

¹¹ Qmang aih manòeq kô, oh daq broq dôq haq gêh trong aih beq, qmang ka oh daq khoe padon haniuq deh ta manoh qmang leq, hi broq tiaq dên padren pang aih.

¹² Majah qmang aih, tàng joq bèn yôc manoh lem ðòeq hnhu am, dahwèq aih men jah dì, haq jah dì tiaq dahwèq bèn i, ùh xài dì tiaq dahwèq wì ma ùh i.

¹³ Au ùh thê oh daq chiuq pangot hrah ðòeq i dahwèq hu tabàih am ka mangai qnoeq, mahaq au enh i kan taq atoq.

¹⁴ Qmang ka manòeq kô, oh daq i rah aih tah am ka mangai ma capòch ðeh, ðòeq jò wì haq loq i rah èh hadai tah hlài ka oh daq jò oh daq ma capòch diq, qmang aih hi jah taq atoq,

¹⁵ tiaq qmang ka bàu khoe achih:
“Mangai jah ma bàc, aih hadai ùh i ka rah, mangai jah ðeh biaq, aih hadai ùh hìaq hamoq.”

¹⁶ Manè apôi Boc Plình khoe broq Tit dìq manoh ka pì oh daq, tìah ka au dìq manoh ka oh daq;

¹⁷ majah qmang aih, haq khoe broq tiaq bàu au hnài, haq hadai i manoh loq nhet, dài haq ma lam hmài ðeh ka oh daq.

¹⁸ Nhèn i thê tam mòeq ngai oh daq wiang lam ti haq, bàc Tagop Hadròeh i bàu manè mangai aih, majah qmang aih mangai aih khoe broq bàc yiniq lem ka Bàu lem.

¹⁹ Qnah hòm Tagop Hadròeh khoe dì haq aih, broq bua lam ti nhèn ðòeq hu wiang wê bài dahwèq tabàih kô, nhèn broq waq ka gêh ðòeq hu

patô qnoh kan qngah qngai da Chuaq, khoe aih òòeq hu patô qnoh manoh lem da cla nhèn.

²⁰ Dôq ajang aih nhèn hujah claih ka bàu qmèq jò nhèn wê bac jèn oh daq wiang tagop bàc qmang kô;

²¹ majah qmang aih, ùh xài nhèn chaq trong òòeq lem toq enh ngèa Chuaq mahaq chaq lem xam enh ngèa kon mangai.

²² Nhèn i yôc mòeq ngai oh daq oe taqne cla nhèn hu lam tam ti wì aih, haq aih hadai i manoh loq nhet haraya, bàc yàng bàc trong nhèn khoe qnhro ngan, hnoq haq aih broq cleq dua òòeq dèh manoh, yàng kô haq hadai yeo nhet ka enh lam ta oh daq majah qmang aih joq haq lùì dèh pì joq qnàng.

²³ Qmang aih, anoe trùh Tit, aih bua au, mangai abroq pajùm ti au taqne pì, anoe trùh wa baiq ngai tau, wa aih mangai wê bàu da Tagop Hadròeh, aih raq kan ranhòm da Christ.

²⁴ Qmang aih, enh ngèa bài wì kô oh daq drah paqnoh deh manoh loq waq beq, patô qnoh hloe bài nen nhèn ma khoe hùà catèh dèh pì oh daq enh ngèa bàc Tagop Hadròeh.

9

Tabàih jò ma taqnàih

¹ Qnah hòh, bìac ti tabàih am ka mangai da Chuaq, aih au pì ep achìh cleq tam ka oh daq.

² Majah qmang aih au loq oh daq khoe padon qmòe deh ta manoh, au khoe catèh dèh pì oh daq enh ngèa mangai Maxêđoan, au doe: Màngai Achai khoe padon òòeq dahwèq hu tabàih enh

hanam adroe raq, manoh loq nhet da oh daq khoe jah parông manoh cliac bacc ngai.

³ Mahaq au khoe the bài oh daq tau truh ti pi, ðoeq ùh hia qngwan ka bàu au ma manè oh daq, waq ka pi chôn h padon ðoeq qmang ka bàu au khoe anoe.

⁴ Au hòq èh mangai Maxêdoan truh ti au yàng aih hnoq oh daq qnhòq i padon qmòe dahwèq cleq, aih èh kan wì haq ma lùì wìh wìa kan camaih ka nhèn, oh daq aih pi anoe hòm majah qmang aih taiq nhèn khoe lùì oh daq.

⁵ Dài aih au majah hèm ep pariaq oh daq tau chôn h lam truh ta pi adroe ka nhèn, hu palauq adroe dahwèq pi ma khoe têu am, ðoeq bài dahwèq aih khoe jah padon ðoeq adroe tiaq deh manoh oh daq ma i deh joq qnàng, ùh xài ep pa àu.

⁶ Hmàng qmang kô oq: Mangai leq rai biaq aih gat biaq, mangai leq rai bacc aih jah gat bacc.

⁷ Rìm ngai ep tiaq deh manoh ma khoe qnac deh adroe ðoeq hu am, ùh xài am ka ùh wìa hadai ùh xài taiq i bô panan, majah qmang aih Boc Plình loq waq ka mangai tabàih am ta kan lem bùi ta manoh.

⁸ Boc Plình i cwàng am ka oh daq xôq ramot ùh ðiq ùh dài ðoeq oh daq ùh hiaq capòch qmòe cleq, mahaq loh qmòe ka i rah ðoeq oh daq hu broq trong lem,

⁹ qmang ka bàu khoe achìh:

“Mangai khoe rai dèh kùng hang, khoe am ka mangai pa,

Kan taq atôq da haq oe hloe mòeq ðoe”.

¹⁰ Boc Plình ma am adrech ka mangai rai adrech xam bèn h ðoeq broq dahwèq acaq, aih èh haq

hadai am ka oh daq pliang adrech rai broq dôq adrech aih chèch lòe tam yeo bàc hòm. Haq tam plì kan taq atoq da oh daq jah yeo bàc hòm.

¹¹ Qmang aih rìm trong oh daq òi jah pagrông, òeòq jah broq bàc trong lem, èh mangai ma jah dahwèq da pì oh daq enh tì kông nhèn wì haq jah manè apôi Boc Plình.

¹² Kùng hang oh daq ma tabàih aih, ùh xài broq toq ka mangai da Chuaq yiyeo òeh ka nan, mahaq haq broq ka bàc ngai i tam manoh loq manè apôi Boc Plình.

¹³ Ajang yiniq broq kô wì haq hnoq manoh oh daq joq loq hamah, aih èh wì ma hijah manè apôi Boc Plình majah qmang aih hnoq oh daq khoe iu tiaq Bàu lem da Christ, manoh oh daq loq waq ka wì haq hloe xam ka rìm ngai.

¹⁴ Jò wì haq waiq khàn ka pì, manoh wì haq bêu ta pì oh daq, majah qmang aih xôq ramot Boc Plình am ka oh daq joq bàc haraya.

¹⁵ Manè apôi Boc Plình majah qmang aih kan tabàih da haq rên ùh òi.

10

Phaulô cwaih rađeh

¹ Tiaq kan loq hamon xam kan laq alàng da Christ au doe ka oh daq, au kô Phaulô joq mangai hamoq òeh qnàng jò yòng enh ngèa ka pì, hnoq jò arù ka oh daq au broq òeh tiah gleq ma tanoq raya!

² Au cali calo ka pì oh daq apaq òeòq jò au trùh tì pì, au ep broq nhang ka pì qmang ka au ma padon broq ka òai mangai ma xoh nhèn loq rìh tiaq dua crông taneh kô.

³ Majah qmang aih yac ka nhèn oe rìh ta crõng taneh kô, mahaq nhèn ùh tablêq ùh tablah qmang ka wì ta crõng taneh kô.

⁴ Ranac da nhèn ðòeq hu tablêq aih ùh xài ranac da kon mangai, mahaq loh enh padren da Boc Plình cwiàng itai, ðòeq hu qnhroh qnìh ðac ðõng bài ðôn wì ma cachàt.

⁵ Canòm ka bài ranac aih nhèn goh ðõng bàu rahen da bài mangai loq padèch raðeh ðòeq hu enh tablêq ka kan rabiaq da Boc Plình, nhèn khech rùp rìm manoh hèm ðòq wì haq broq ðõng hapõng ka Christ.

⁶ Jò pì oh ðaq ðìq khoe iu tiaq bàu, nhèn hadai yõc ranac aih raq ðòeq hu tabroq ka bài mangai ma ùh iu tiaq bàu.

⁷ Oh ðaq ngan toq enh gùng qmòh? Tàng i mangai leq ðòe ðeh kô mangai da Christ, nhèn kô hadai mangai da Christ.

⁸ Yac ka i jò au loq capoch catèh cla raðeh toq bìa trong cwiàng itai Chuaq am ka nhèn ðòeq hu grom gri oh ðaq, ùh xài ðòeq broq ka raliang dài au ma blinh ùh camaih cleq;

⁹ au ùh enh taqnùq pì oh ðaq xi jàiq au ma achìh kô.

¹⁰ I mangai ðòe: “Jò ma achìh jàiq Phaulô capoch nhang raya mahaq trùh jò i cla aih, haq ùh i lènh nèn cleq, bàu haq capoch hanoh ùh loh cleq”.

¹¹ Mangai capoch qmang aih khòh hèm: Jò nhèn arù bàu tajàiq qmang leq, jò i cla, nhèn hanoh broq qmang aih.

¹² Joq nhèn ùh hùà ðaq aðàng ka cabô, ùh enh wêh raðeh ti bài mangai loq pliang raðeh. Mahaq cla wì wêh ðeh cla, cla wì ngan ðeh ajang cla,

qmang aih cla wì raq patô rađeh ùh lênh i kan rabiaq.

¹³ Da nhèn hòm, nhèn ùh catèh rađeh yeo loe ka acang ma pajaq, tiaq pang aniang Boc Plinh khoe pajaq am ka nhèn, tiaq acang pajaq aih nhèn majah trùh ta oh daq.

¹⁴ Nhèn ùh cadiang loe dèh ka acang jò nhèn trùh ta pì oh daq, majah qmang aih oh daq oe ta acang aih. Joq nhèn raq ma khoe aràng Bàu lem da Christ trùh tanòe pì adroe dõng.

¹⁵ Nhèn ùh pajiang hrìn rađeh, hadai ùh catèh ataq yiniq da mangai qnoeq ma broq, mahaq nhèn ngèh ka manoh lùì da oh daq èh rai tồc tam, aih dõq biac nhèn ma patih taqne oh daq hujah yòng kàn diq, tiaq acang ma khoe pajaq am ka nhèn;

¹⁶ qmang aih èh òeoeq nhèn jah aràng Bàu lem yeo hangai ka gùng da pì oh daq, majah qmang aih nhèn ùh enh catèh rađeh tanòe acang taneh da mangai mangai qnoeq abroq oe toq hi gèh.

¹⁷ Mahaq tàng cabô catèh rađeh, drah catèh rađeh enh dalam ka Chuaq.

¹⁸ Majah qmang aih, ùh xài mangai leq pliang rađeh aih diq khòh jah manè, mahaq toq mangai da Chuaq ma thê dèh raq.

11

Mangai tiaq cla ma joq qnàng xam mangai tiaq cla pađui

¹ Joq qnàng! Au ngèh đeh pì oh daq àt chiùq da au kan blùng toq biaq! Ma joq qnàng, oh daq khòh àt chiùq.

² Au qmang tarènh ka pì tiàq kan tarènh enh plình, majah qmang aih au khoe capoch ka pì mòeq ngai ǒng raq, òòeq au jah patô pì oh daq qmang ka mangai gu adrùh hliang sriu òòeq dèch am ka Christ.

³ Mahaq au yùq qmang ka calah nèh bìh ma khoe padô Êva qmang leq, èh manoh cliac da oh daq hadai loq loh ka pì wìa, hnhung đac kan hliang lem ka Christ qmang aih diq.

⁴ Majah qmang aih tàng loq i mangai qnoeq trùh hnài ònh ka oh daq mòeq Jesus ma qnoeq, crài ka Chuaq Jesus nhèn ma khoe hnài, mòeq yiang ma qnoeq crài ka Yiang Hadròeh pì ma khoe jah, ùh meh mòeq Bàu lem qnoeq crài ka Bàu lem oh daq ma khoe jah, aih èh canau pì waq!

⁵ Mahaq au hèm yac ka bài mangai tiaq cla aih loq haqn hèq dàng leq, au dua ùh yì hamoq ka wì aih yac ka toq bìa hnha!

⁶ Trong bàu tapoch, au ùh rabiaq, mahaq au i kan loq, nhèn khoe patô ka oh daq jah hnoq trong aih rìm hì.

⁷ Au anoe hnài Bàu lem da Boc Plình ka pì, au hnài ònh dech, au caqnìh rađeh ka haqneq òòeq oh daq jah dèch ka haqn hèq. Qmang aih, au ahiaq i yiniq lui cleq loq ùh?

⁸ Au khoe yǒc baha, hatùh hatah dahwèq enh Tagop Hadròeh qnoeq òòeq hu wiang patih ka pì.

⁹ Jò oe ti pì oh daq, glàm kan nanxa, au ùh pangài ka cabô, majah qmang aih oh daq enh gùng Maxêđoan trùh, khoe aràng ka au dahwèq au ma nhet ka i yiniq waq. Au khoe wèq rađeh òòeq au ùh hiaq wìa kan trap ka oh daq. Tangèa kô èh dua qmang aih raq.

¹⁰ Kan joq qnàng da Christ oe enh dalam ka au, dài aih tagùng Achai ùh i mangai leq jah tət da au kan catèh aih.

¹¹ Hagleq qmang aih? Ahiaq au ùh qnì waq ka pì oh daq ùh xài? Khoe i Boc Plình loq!

¹² Mahaq trong au khoe broq, dua au oe raq broq, majah qmang aih au ùh enh dōq wì tau jah nen hu catèh, wì doe yiniq broq da wì haq hadai daq adàng ka da nhèn.

¹³ Majah qmang aih bài mangai qmang aih, ùh xài mangai tiaq cla joq qnàng, wì haq patih ka kan qnùt, ti patiah ðeh broq mangai tiaq cla da Christ.

¹⁴ I cleq ep hamàih, cla Satan jì patiah ðeh broq bình plình qngah qngai.

¹⁵ Qmang aih, bài mangai patih ka haq ti patiah ðeh broq mangai patih ka kan taq atōq, ùh i cleq ma ep hamàih, mahaq kan pulùch da wì haq jah tajì wop tiaq yiniq wì haq ma khoe broq.

Phaulô ùh camaih ka raðeh xalep

¹⁶ Au anoe tam: Apa q i cabô ngan au qmang ka mangai blùng. Mahaq tàng loq i mangai leq hèm qmang aih, pì dōq au blùng beq, aih raq au hujah catèh raðeh toq biaoq.

¹⁷ Bàu au ma anoe kô, aih au anoe tiaq ðeh cla au loq ka raðeh, ùh xài anoe tiaq da Chuaq, mahaq qmang ka da mangai blùng.

¹⁸ Bacc ngai tiaq xech akia ðoèq hu catèh raðeh, au hanoh catèh ðeh diq.

¹⁹ Majah qmang aih, oh daq aih mangai rabiaoq mahaq lem bùi ka tamàng mangai blùng.

²⁰ Joq, oh daq xan dōq yôt wì rùp raðeh broq ðic hapóng, dōq hloe wì lonh apom, dōq wì blah yōc

da oh daq, dôq wì padèch rađeh ðòeq hu halê rai tep ta tabôc oh daq.

²¹ Au broq ka nhèn kan camaih jò anoe bàu kô, nhèn joq khoe ùh hùà trong aih. Mahaq tàng cabô i yiniq cleq hùà catèh rađeh, au anoe troeq mangai blùng: Au hanoh hùà.

²² Wì haq mangai Hêbru ùh xài? Au hadai. Wì haq mangai Isorali ùh xài? Au hadai. Wì haq nang noe Apraham ùh xài? Au hadai.

²³ Wì haq mangai patìh ka Christ ùh xài? (capoch qmang ka mangai ùh qnì) Ôq! Au kiang ma yi loe! Au khoe xalep yi hnau ka wì, oe tù yi bàc, wì blai yi bàc. Bàc yàng au hwaq cachit,

²⁴ padam yàng mangai Juđa hwat au xi long roe, rìm yàng tam moeq qmang blai hòh hi bình pôn jàt.

²⁵ Piq yàng wì tong xi long dùi, moeq yàng wì ðàp xi hmo, piq yàng cram boang. Au khoe ðòng mòeq hì mòeq mang ta diac raxìq.

²⁶ Bàc yàng au lam ti trong, yat ti cròng diac, yat ka mangai atùng, yat qne hadai mangai Juđa, yat ka mangai diac wì, yat ta plài, yat tanòe hawit, yat ta diac raxìq, yat ka oh daq ma loq ti gôpla.

²⁷ Au khoe abroq xalep, bàc yàng rìu qngah ka mang, pangot croh ranóng, ja ka oe rôn, au khoe hmaq tanget hmaq oe chac dech.

²⁸ Qnhòq rèn yiniq qnoeq hòh, aih rìm hì au ðìq ep lèt ka rìm Tagop Hadròeh.

²⁹ I cabô ùh nèn, au ma ùh tàng tìah qmòe cla au ùh nèn? Cabô tacro au ma ùh tàng tìah gleq i ùnh bùh ta cliac clèm au qmòh?

³⁰ Tàng joq ep catèh au enh catèh toq dèh kan

hamoq da au.

³¹ Boc Plình aih Baq da Chuaq Jesus Christ, haq aih ma khòh manè apôi mòeq ðòe mòeq tui, haq loq ka au ùh capoch qnùt.

³² Oe ta Đamat, cwan kàn da bùa Arêta thê wì rap ta aih hu rùp au.

³³ I oh daq yỏc rajỏng cadrai qnoh au enh ti qmỏc gàu tiaq haqmai panàt canàng plài aih, meh au hi claih enh tì kỏng haq aih.

12

Phaulô hnoq kan mahnu

¹ Au ep catèh raðeh yac ka ùh jah cleq. Au anoe trùh bài yiniq au hnoq ta kan mahnu enh Chuaq.

² Au loq mòeq ngai da Christ, adreo kỏ khoe mòeq jàt pỏn hanam adroe, khoe jah dẻch atỏc caloeh trỏc ma piq (ta chac cla haq, qnì enh gùng ka chac cla haq, au ùh loq, i Boc Plình loq).

³ Au loq mangai aih (ùh qnì ta chac haq, qnì enh gùng ka chac haq, au ùh loq, i Boc Plình loq);

⁴ jah atỏc ta Barađi, ta aih tàng bàu mahaq ùh jah doe hlài, hadai ùh lòh ka cabỏ capoch qnoh.

Phaulô catèh dẻh toq kan ùh nẻn

⁵ Au jah catèh trùh mangai aih, mahaq da cla au, au ùh catèh, catèh dẻh toq kan ùh nẻn raq hẻq.

⁶ Yac ka au enh catèh raðeh, au dua ùh xài mangai ratùt, majah qmang aih au anoe jỏq qnàng, mahaq au ùh anoe dỏq ùh hịaq i cabỏ doe au capoch yeo dỏch ka yiniq wì ma hnoq au broq xam bàu wì ma tàng ajang au.

⁷ Qmang aih, yùq au loq padèch hrìn rađeh ajang nòe đeh hnoq mahnu kàn kaiq qmang kô, dài majah khoe thê mòeq toq yila padom ta xech akia au, aih mangai da Satan, ðòeq hu jêh au, ðòeq broq ka au apaq dèch rađeh;

⁸ khoe piq yàng au waiq khàn ka Chuaq thê yiniq aih loh hangai enh chac au.

⁹ Mahaq Chuaq padreo bàu doe: “kan tabàih dech Au am ka ìh khoe lap, majah qmang aih padren da Au jah geo ta kan hamoq ìh”. Aih ìq dài au majah lem bùi enh toq catèh dèh kan ùh nèn, dôq kan dèh da Christ oe enh dalam ka au.

¹⁰ Qmang aih, ðòeq jah lòeq Christ dài au majah bùi ka oe ta kan ùh nèn, ta bàu capoch qmèq, xalep, khech rùp, nanxa. Majah qmang aih, jò au ùh nèn aih raq jò au tadèh.

Kan hliang lem da Phaulô

¹¹ Au majah khoe blùng aih pàng oh daq panan au, oh daq manè au aih ma troq, yac ka au ùh loh cleq, au ma i yeo hamoq cleq ka bài mangai tiaq cla ma kàn tau.

¹² Jò au oe taqne pì, au khoe paqnoh dôq pì hnoq au kô joq qnàng mangai tiaq cla da Christ, ajang kan au loq kềm rìm trong, hloe xam teo hamàih xam kan halac.

¹³ Manòeq kô, enh gùng ka au ma ùh pangài ka pì oh daq, aih oe i yiniq cleq pì ma ùh diang Tagop Hadròeh qnoeq? Ajang kan ùh taq atoq aih, pì apaq tamrua ka au oq!

¹⁴ Yàng kô aih yàng piq, au padon lam ta oh daq, au ùh pangài cleq ka pì, majah qmang aih ùh xài au chaq da pì dahwèq, mahaq chaq qmòe cla pì

qmat raq, joq ùh xài kon ep atech òòeq dahwèq ka miq baq, mahaq miq baq ma atech òòeq am deh ka kon, ma aih ùh hnau hòm;

¹⁵ ða au hòm, au toq enh am deh kùng hang am hloe xam cla au ka mahua yiang oh ðaq, tàng au loq waq ka pì rai èh rai bàc qmang aih, wìa ka pì loq waq ka au rai èh rai bìa qmòh?

¹⁶ Mahaq i mangai doe, yac ka au qnhòq lah pangài ka pì cleq, mahaq au kô magài tai cliac khoe yòc deh kan rabiaq òòeq rùp padràng pì.

¹⁷ Au alah thê cabô lam padô alúan yòc ða oh ðaq cleq ùh?

¹⁸ Yàng adroe nèh au khoe thê Tit lam hmàih ka oh ðaq, yòc tam mòeq ngai taqne nhèn òòeq wiang lam ti haq. Ahiaq Tit khoe padô yòc ða pì cleq ùh? Ma ùh xài nhèn hadai canòm mòeq Yiang Hadròeh òòeq hadai cadiang tiaq mòeq teo jènh raq qmòh?

¹⁹ Enh nèh trùh manòeq, pì toq hèm nhèn chaq trong òòeq aclai ka raðeh enh ngèa pì oh ðaq. Mahaq enh dalam ka Christ, oe enh ngèa Boc Plinh, nhèn doe bài bầu kô, rìm yiniq kô ðiq òòeq ka oh ðaq jah ðeh qnhrang.

²⁰ Majah qmang aih, au hòq jò au trùh ta oh ðaq au ùh hnoq tiah ka manoh ma ngèh, oh ðaq hadai hnoq au ùh tiah ka manoh pì enh. Au yùq taqne oh ðaq loq oe i kan talech, tagrinh, tanòeh, ùh hatroq, capoch dech, capoch qmèq ka dabau, catèh xam kan manhài.

²¹ Au yùq hòm, jò au trùh ta oh ðaq, Boc plinh au loq broq ka au ep camaih xep enh ngèa pì oh ðaq, èh au ep crò hmoe ka mangai khoe broq yiniq lui enh nèh trùh manòeq mahaq ùh dùh qmòe

ka loq raxach trong amù, tango taqnung, xam trong talìq talàn tiaħ wì haq ma khoe broq.

13

Bàu pariaq, bàu hangah pulùch

¹ Kô èh yàng piq au padon trùh ta oh daq. Rìm yiniq jah dì tiaq bàu baiq piq ngai ma wiang panhìn.

² Jò au trùh hmàih ka oh daq yàng baiq nèh, au khoe doe ka mangai adroe kô nèh ma khoe broq yiniq lui hloe xam ka mangai qmoeq, manòeq kô au yac ka au arù, mahaq dua au chônħ doe hòmh: Jò au trùh au pi oe taqnùh cleq ka cabô hòmh.

³ Patep pang jò oh daq bòch waq ka loq i nen cleq ðòeq hu panhìn joq Christ i capoch hnài ajang au. Haq aih ùh xài mangai ùh loh cleq taqne pì, mahaq ðêh haraya.

⁴ Majah qmang aih, haq khoe tiang ðình talong pagat ta kan ùh nèn, mahaq haq khoe rìh ta cwìang i tai Boc Plình, hanoh qmang aih, nhèn ùh nèn enh dalam ka haq, mahaq nhèn rìh ti haq enh dalam cwìang itai da Boc Plình, ðòeq hu abroq taqne oh daq.

⁵ Cla pì oh daq ngan hlài deh chiac beq, ðòeq hu loq ðêh i manoh lùì loq ùh? Nhro ngan raðeh beq, oh daq ma ùh hnoq i Chuaq Jesus Christ oe enh dalam ka oh daq ùh? Waq toq oh daq ùh hìaq khoe troq ka caðac.

⁶ Nhèn ngèh ka oh daq canau hnoq nhèn kô ùh xài mangai troq ka caðac.

⁷ Manòeq kô nhèn waiq khàn ka Boc Plình ðôq oh daq ùh broq trong qmèq, ùh xài ðòeq ka wì

loq nhèn kô mangai khoe qnhrang ta kan qnhro, mahaq dôq pì oh daq jah broq trong lem, yac ka hnoq nhèn tiaq gleq mangai khoe troq ka qnoh đac.

⁸ Majah qmang aih, nhèn ùh jah broq cleq ma pagau hlài ka bàu joq qnàng, mahaq toq hatroq tiaq bàu joq qnàng.

⁹ Yac ka nhèn ùh nac canèn, mahaq waq toq oh daq jah tadêh aih nhèn khoe lem bùi raya, bàu nhèn waiq khàn aih waq ka oh daq jah gêh geo rìm trong.

¹⁰ Aih iq dài jò arù, au majah achìh ka oh daq bài trong kô, đòeq jò i mat au taqmat, au ùh hìaq ep broq nhang tiaq cwìang Chuaq ma am ka au, aih cwìang đòeq hu dèch paqnhrang ùh xài đòeq hu raliang đac.

¹¹ Pulùch, oh daq drah bùi beq, drah hnàn tiaq kan gêh geo, alòng dabau, pajùm mòeq manoh oe ma hatroq ti dabau, aih èh Boc Plình da kan loq waq xam kan catèm oe ti pì.

¹² Yóc nà hìp hadroèh đòeq hu hmàih dabau. Dìq dõng mangai da Boc Plình tagùng kô i bàu bòch hmàih ka oh daq.

¹³ Waiq kan tabàih dech da Chuaq Jesus Christ, kan loq waq da Boc Plình, kan taqmùt da Yiang Hadròeh oe dìq ti oh daq.

Hset Hadròeh
The New Testament in the Hre language of Vietnam,
translated by Baq Thi

Copyright © 2024 Baq Thi

Language: (Hre)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-23

PDF generated using Haiola and XeLaTeX on 26 Jul 2025 from source files dated 23 Jul 2025

03fbbc53-13cb-5444-945a-741163b0252d